



SIARAN AKHBAR

NFLD 2026 DILANCARKAN BAGI MENGGALAKKAN TABIAT KEWANGAN BIJAK UNTUK KESEJAHTERAAN KEWANGAN YANG LEBIH KUKUH

**Hari Rabu, 2 September 2026 bersamaan dengan 20 Rabiulawal 1448
Hotel Antarabangsa Rizqun, Gadong**

1. Brunei Darussalam Central Bank (BDCB) telah melancarkan Hari Celik Kewangan Kebangsaan ataupun National Financial Literacy Day (NFLD) 2026 pada hari ini, menandakan bermulanya acara selama tiga hari yang bertujuan untuk memperkukuh pengetahuan kewangan, menggalakkan tabiat kewangan yang positif serta meningkatkan kesejahteraan kewangan di Negara Brunei Darussalam.
2. Hadir selaku Tetamu Kehormat ialah Yang Berhormat Datin Seri Setia Dr Hajah Romaizah binti Haji Md Salleh, Menteri Pendidikan dan Pengerusi Majlis Kebangsaan Celik Kewangan (MKCK). YB Tetamu Kehormat telah melancarkan NFLD 2026 bersama Yang Mulia Dayang Hajah Rashidah binti Haji Sabtu, Pengarah Urusan BDCB.
3. Majlis dimulakan dengan ucapan alu-aluan oleh Yang Mulia Dayang Hajah Rashidah binti Haji Sabtu yang menekankan kepentingan untuk memastikan akses yang lebih luas kepada perkhidmatan kewangan dapat menyumbang kepada peningkatan kesejahteraan kewangan. Walaupun lebih 80% penduduk negara mempunyai akses kepada perkhidmatan kewangan formal, beliau menekankan bahawa rangkuman kewangan perlu disokong oleh tahap celik kewangan yang kukuh serta tingkah laku kewangan yang bertanggungjawab bagi mendukung kesejahteraan kewangan dalam jangka panjang.
4. Beliau turut mengetengahkan celik kewangan digital sebagai bidang yang semakin penting untuk diberikan perhatian, khususnya dengan penggunaan perkhidmatan kewangan digital yang terus berkembang. Kaji Selidik Kebangsaan Celik Kewangan 2026 merekodkan skor Celik Kewangan Digital sebanyak 43%, yang menunjukkan keperluan untuk terus memperkukuh keupayaan individu dalam menggunakan dan mengendalikan perkhidmatan kewangan digital dengan yakin dan selamat. Keperluan ini turut diberi perhatian di peringkat serantau, dengan BDCB menyumbang kepada pembangunan Kerangka Kompetensi Celik Kewangan Digital ASEAN bagi memperkukuh keupayaan dalam bidang ini.
5. Majlis turut menampilkan ucap tama oleh Dr Joanne Yoong, Pengasas dan Ketua Pegawai Eksekutif Research for Impact, Singapura, bertajuk *“Daripada Pengetahuan kepada Tindakan: Pemahaman Tingkah Laku untuk Memperkukuh Kesejahteraan dan Kedayatahan Kewangan”*. Ucap tama tersebut meneliti jurang yang masih wujud antara pengetahuan kewangan dan amalan sebenar, dengan mengetengahkan bahawa pemahaman semata-mata tidak semestinya membawa kepada keputusan kewangan yang lebih baik. Ucapan itu turut membincangkan bagaimana kecenderungan tingkah laku, perkhidmatan kewangan digital dan penipuan berasaskan kecerdasan buatan (AI) menimbulkan cabaran

baharu, sekali gus menekankan keperluan terhadap dasar, produk dan pendidikan kewangan yang lebih berkesan.

6. NFLD 2026 akan diteruskan hingga 4 September 2026 melalui pelbagai aktiviti pendidikan kewangan. Orang ramai dialu-alukan untuk mengunjungi Jerayawara Kesedaran Kewangan yang akan diadakan di kawasan lobi, The Mall, Gadong, bagi mendapatkan maklumat lanjut mengenai pengurusan kewangan serta menerokai pelbagai produk dan perkhidmatan kewangan yang tersedia. Di samping itu, sesi Taklimat Kewangan akan diadakan bagi para jemputan daripada agensi-agensi kerajaan, syarikat-syarikat berkaitan kerajaan dan institusi-institusi pengajian tinggi.
7. Acara ini disokong oleh MKCK dan dilaksanakan dengan kerjasama Pasukan Polis Diraja Brunei, Tabung Amanah Pekerja, Lembaga Kemajuan Ekonomi Brunei (BEDB), Cyber Security Brunei, Perbadanan Tabung Amanah Islam Brunei (TAIB), National Digital Payments Network Sdn Bhd (ndpx), Financial Planning Association of Brunei Darussalam, Bank Islam Brunei Darussalam Berhad (BIBD), Baiduri Bank Sdn Bhd, Standard Chartered Bank, Syarikat Takaful Brunei Darussalam Sdn Bhd, AIA, Great Eastern, BIBD Securities Sdn Bhd, Baiduri Capital Sdn Bhd dan Standard Chartered Securities (B) Sdn Bhd. Usaha kolektif ini mencerminkan komitmen bersama untuk memperkukuh kesedaran kewangan serta membina masyarakat yang lebih berdaya tahan dari segi kewangan.
8. Untuk maklumat lanjut mengenai NFLD 2026, orang ramai boleh melayari www.bdcdb.gov.bn atau mengikuti @centralbank.brunei dan @usinwise di Instagram.

Brunei Darussalam Central Bank

Tarikh: 2 September 2026 / 20 Rabiulawal 1448

Rujukan: BDCB/COMMS/3

National Financial Literacy Day (NFLD) merupakan acara celik kewangan tahunan yang diterajui oleh Brunei Darussalam Central Bank (BDCB) dengan sokongan Majlis Kebangsaan Celik Kewangan (MKCK).

Antara objektif acara ini adalah untuk:

1. Meningkatkan tahap celik kewangan di Negara Brunei Darussalam;
2. Menggalakkan pengurusan kewangan yang bijak; dan
3. Meningkatkan kesedaran mengenai produk dan perkhidmatan kewangan yang tersedia di Negara Brunei Darussalam.

Bersama-sama, kita dapat membina masyarakat yang celik kewangan dan berdaya tahan dari segi kewangan.